

四庫全書

史部

欽定四庫全書

浙江通志卷二百六十八

藝文十

銘

塗山銘

并序

唐柳宗元

維夏后氏建大功定大位立大政勤勞萬邦和寧四極
威懷九有儀刑後王當乎洪流方割災被下土自壺口
而導百川大功建焉虞帝耄期順承天歷自南河而受

四海大位定焉萬國既同宣省風教自塗山而會諸侯
大政立焉功莫崇乎禦大災乃錫元圭以承帝命位莫
崇乎執大象乃輯五瑞以建皇極政莫先乎齊大紀乃
朝玉帛以混經制是所以承唐虞之後垂子孫之丕業
立商周之前樹帝王之洪範者也嗚呼天地之道尚德
而右功帝王之政崇德而賞功故堯舜至德而位不及
嗣湯武大功而延祚於世有夏德配於二聖而唐虞讓
功焉功冠於三代而商周讓德焉宜乎立極垂統貽於

後裔當位作聖著為世準則塗山者功之所由定德之
所由濟政之所由立有天下者宜取於此追惟大號既
發華蓋既狩方岳列位奔走來同山川守臣莫敢遑寧
羽旄四合衣裳咸會虔恭就列俯僂聽命然後示之以
禮樂和氣周洽申之以德刑天威振耀制立謨訓宜在
長久厥後啓征有扈而夏德始衰羿距太康而帝業不
守皇祖之訓不由也人亡政墜卒就陵替向使繼代守
文之君又能紹其功德修其政統卑宮室惡衣服拜昌

言平均賦入制定朝會則諸侯常至而天命不去矣茲山之會安得獨光於後歟是以周穆遐追遺法復會於是山聲垂天下亦紹前軌用此道也故余為之銘庶後代朝諸侯制天下者仰則於此其辭曰

惟禹體道功厚德茂會朝侯衛統一憲度省方宣教化制殊類咸會壇位承奉儀矩禮具樂備德容既孚乃舉明刑以弼聖謨刑戮防風遺骨專車克威克明疇敢以渝宣昭黎獻底定寰區傳祚後引丕承帝圖塗山巖巖

界彼東國惟禹之德配天無極即山刊石貽後作則

石傘峯銘

唐顧況

亭亭石傘有物有名如蓋若傾如芝一莖石傘山東山
銜日宮石傘山西山銜月宮南巒北阜首出屹雄

禹穴碑銘

并序

唐鄭魴

惟帝聖世時必有符命在昔黃帝始受河圖王錄安義
得神蓍而垂皇策配璇璣玉衡以齊七政舜繼成六德
文王獲赤雀丹書而演道定謨予亦以謂禹探其穴得

開世之符而成乎水功夫神人合謀而行變化天地定位陰陽潛交五行迭王斗建司節岳尊山而瀆長川乃至日星雷風禎祥秘奧三綱五紀萬樂百禮人人物物各由身生無非元功冥持至數脗合以及之者王者奉天而行故聖神焉帝皇焉彼聖如仲尼有德而無應故位止於旅人福弗及生靈乃歎曰鳳鳥不至河不出圖吾已矣夫然後知元命者軒後命者羲受命者唐虞成命者禹備命者文仲尼不受命乃假人事而言故有

宗予之說後代無作焉立言者一仁義以束世教瞽瞍
蚩蚩使絕其非望職業之外存而不論予讀夏書無是
說司馬子長自叙始云登會稽探禹穴不然萬禩何傳
焉惑矣蒼山之瀕呀如淵如陵徙谷遷此中不騫雨洗
烟空敞然莫窮噫實禹迹之所始終唐興二百八祀寶
歷景午秋九月予從事於是邦感上聖遺軌而學者無
述作禹穴碑廉察使舊相河南公見而銘之曰

禹穴宜載夏與秦胡為而不載

禹貢無文秦始皇游會稽李斯刻石亦不言

古而不載遷與鄭胡為而載

始司馬遷自叙探禹穴而後千百年無說至鄭乃製

斯碑予以謂天德統萬止言其蓋地德統萬止言其載堯

德統萬止言其大千川萬山皆言其會一符一穴

禹穴藏五

符統而言之故曰一

不足為最故夏與秦俱不之載而人以之昧

雖山之堅雖洞之滅有時而堙有時而兑歲其萬千風
雨淘汰亡其嵌呀叢是翳薈惟鄭與遷斯碑斯載斯時
之賴

明州新刻漏銘

宋 王安石

戊子王公始治於明丁亥孟冬刻漏具成追謂屬人嗟
汝予銘自古在昔挈壺有職匪器則弊人亡政息其政
謂何弗棘弗遲君子小人興息維時東方未明自公名
之彼寧不勤得罪於時厥荒懈廢乃政之疵嗚呼有州
謹哉維茲維茲其中俾我後思

梅子真泉銘

宋陸游

距會稽城東北七里有山曰梅山山之麓有泉曰子真
泉遊者或疑焉智者及道人求笠澤漁父為之銘銘曰

梅公之去漢猶鵠夷子之去越也變姓名棄妻子舟車
所通何所不閱彼吳市門人偶傳之而作史者因著其
說倘信吳市而疑斯山不幾乎執一而廢百梅公之去
如懷安於一方則是以頸血丹莽之斧鉞也山麓之泉
甘寒澄澈珠琲玉雪與子徘徊酌泉飲之亦足以盡公
之高而歎其決也

五畝塍銘

宋 成無玷

湯湯茗水發於天目兩湖灌輸歲堙為陸漲流時至雲

日蕩沃旁合百源滙於山足勢溢以傾怒濤奔蹙高卑
之際歲惟版築拓基五畝隨潤北屬水溢乃流如槩諸
斛蓄洩得宜高下成熟自媵之壞歲亡半菽茂宰因民
無廢不復慮始云難勸趨判速既堅既厚旁郡蒙福咨
爾後人嘉績斯續南湖之陽鳳凰之麓石林崢嶸驚湍
回曲勒此銘詩尚識陵谷

德泉銘

并序

元
鮮于樞

橫陽岸海為邑土層淺薄井泉不冽邑人病之前宋時

邑人宋氏得清泉於昆山之陽引以巨竹承以石池邑人取足焉歲用竹百丈役二人皆出宋氏今有年矣大德元年九月本道廉訪僉事完顏貞按部見而嘉之時樞亦以公事至州公曰是不可不名亦不可不述名而述之非子其誰毋讓樞退考諸易得蒙之象遂名曰德泉且告之曰斯泉也當蒙而未達梯崖架壑期於必致非果行歟既達矣蓄以育物非育德歟育已之德而及於人若宋氏者非君子歟以德名之其誰不然公曰諾

乃大書二字於石旌善勸功焉銘曰

感沸清泉發茲靈岳柔滑甘寒可烹可瀹
覽以致用厥施斯博流泉散雪四時不涸
瞻彼巨海百川所歸出而不返作醎是
宜如人之身漩汗涕洟泉出百原譬猶華
池味甘色白灑灑生肥飲之壽考松喬可
希坡仙之言信不我欺有美宋氏心瘁
體勤果行於已育德於人功在邑人澤
流子孫侃侃廉卓旌善勸功扛鼎之筆
虎螭挈空勒銘山根與泉無窮

大若巖靈真宮銘

并序

元虞集

大若巖在溫州永嘉縣北八十里道書所謂赤水丹山
福地者也其山周回五十里巖高十七丈深百四十尺
廣倍之石環中虛容光東啓居焉如在屋室大抵世言
洞穴多在幽暗險絕必傍行仄入莫窮其所至篝火捫
索乃頗有見以為竒未有若是之明爽者也有石高數
丈當其前若門屏然其北有東西兩溪合流導巖下匯
為龍潭而南出其西溪相傳有赤水時出飲者養壽今

山下多老人百十歲而赤水不常有也沿溪皆奇石可
以物象名者若香爐石笋屏霞蓮花之屬凡數十處其
不可名者至多也溪之源有兩瀑布皆垂數百尺一曰
如淦一曰傳巖傳巖尤奔怒者也晉永嘉中道士傳隱
遙居此後王貞白隱此洞其弟子朱孺子見白犬走枸
杞叢下疑之掘得根若犬形者烹食之身輕登石臺仙
去故名其臺曰飛昇臺而枸杞豐茂異常產來遊者皆
擷茹之後亡或云猶在曾有人見之其後陶隱居著真

誥此巖又名真誥巖又嘗煉丹層巖中夜坐時或望見
光煜煜然云是丹光也唐時人間以水旱疾癘禱巖下
輒應咸通七年恩王府參軍知永嘉監崔元德始請於
朝立祠度道士居之與田四百五十畝禁樵採一里宋
宣和中建三清宮巖中賜名廣福靈真宮巖中風雨不
及至今若新成者又有兩殿五祠一鐘樓皆在巖下道
館庖庫在巖外慶元中道士婁懷玉王師皓知宮事皆
修治之入國朝用溫州道錄兼領故其徒散理別業宮

廢不治大德四年道士曹淵龍始專居之出私錢募人
墾其山隄其溪水導其堦蕪得田數十畝益以已產悉
資宮中之用作齋堂治凡屋之當治者幾二十年而宮
事備天子璽書護之俾以其徒世相傳勿敢有所易淵
龍瑞安人其先累世事故宋致位清顯故家凋喪方從
黃冠遊至是兩被恩命提點宮事蓋吉士也宜其如此
淵龍嘗曰上巖後山一里得最高處遊者至此聞鐘磬
聲相戒勿敢動而去淵龍數至其處無所聞然實奇勝

地蜀郡虞集為著銘曰

若中虛容作室門出震當離日承闕端鎮巨石陶朱君
千百年赤水隱源木葛綿綿曹淵龍修其宮學仙翁萬
靈受命斥物怪非有道者勿敢至矧敢壞勒以吾銘示
千載

連槐堂銘

并序

明
宋 濂

人事無與於草木乎孝友之徵古多記之矣草木果符
於人事乎大舜閔曾之行未聞形草木之祥也然則何

所定歟人之於天體異而氣同養吾氣以感之寒暑自我而平日月自我而明山川自我而不震驚鳥獸可育四靈可至況草木乎然而有得有不得者變也物隨應者常也變者天之權常者天之經以聖賢之德盡為人之道固其職也雖弗報焉可也未至於聖賢而能不悖乎道烏可以弗旌乎是權也或因物以著戒或設象以假義又權之教人也苟逐逐焉而報之智者可以理推愚者可以幸得則不足以為天矣天道之權吾於會稽

周氏徵之周氏兄弟曰彛兌皆賢而文居新昌彩烟山中事母甚孝入門少長秩秩有序其氣穆然若陽春鄉人稱為孝友舍傍樹槐一章高尺餘歧為二榦及肩交合為一左右之枝各三挺然上數尺再合而再交焉觀者咸歎其異以為彛兌孝友之徵乃以連槐字其堂其友王宗成來京師為請銘槐之為音近於懷懷者思也所以表其孝友而教後人以思也後人覩斯槐寧不悠然以思乎其枝歲繁而時茂猶子孫之愈久而多也子

孫雖多其於祖則一而已猶槐之衆枝本於榦也嗚呼
周氏後人孝思其不忘乎此天之所以教也烏可以不
銘銘曰

周氏孝友德斯植天產厥槐世希覲巨本數圍去地尺
岐為雙榦挺雄特及肩而交交復副既副羣枝合如織
鄉民里耄嘆以嘖炯哉竒祥古未識吾知元化彰厥德
俾爾後嗣思以則枝繁榦別勢莫抑同氣殊分麗千億
槐枝可連人不可析

浦江縣漏刻銘

并序

明 陳公凱

婺屬邑浦江舊有漏刻歲久器敝知縣事何宗姚續置
且法最詳人皆准而信之後為當路者取去莫知所留
矣至大己酉達魯噶齊呼都克盡覓敦武慨思舊典遂依
式重造且處其所以守之者非勤政而知所先務歟前
婺州路月泉書院山長陳公凱為之銘曰

撫字之官大要以剗繁治劇興滯補敝為最厥有懈廢
匪政之成其政維何必也寬猛克濟弗棘弗遲然後愛

民之仁推而為創物之智而咸服其精故三尺之箭五斗之鉗不贏不虧以正以平晝夜晷刻申縮合度可以測陰陽寒暑四時之運行凡任於茲者盍思古人挈壺氏之有職前賢蓮花漏之有銘後之視今今之視昔亦庶幾更點之分明矣

尊經閣銘

明章懋

有閣峩峩屹立儒宮上摩奎宿下拱文峯閣中何有有圖有籍龍牒龜文蟲篆鳥跡外史所掌廣宇所司九流

七略並蓄無遺翠蘊丹函牙籤寶軸簡蠹香芸編殘汗
竹惟閣有書莫尊於經聖筆刪定萬世典型易象春秋
詩書禮樂法言大訓灝灝噩噩世遠人亡斯文在茲何
以尊之古聖是師丹碧輝煌匪閣之美昭昭人文天經
地緯梁棟崢嶸匪閣之崇洋洋聖道蟠極蒼穹閣以藏
書象彼東壁於經斯尊視此銘刻

贊

三高贊

宋
朱 臨

矯矯朱公當世英雄卓然先識力避成功種也不悟語
已旋凶越壤千里齊祿萬鍾取如拾芥棄若飄蓬五湖
長往千載清風

范蠡

翹翹季鷹江東步兵抗心世務俛首塵纓顧時多艱無
日昇平秋風動地鱸膾馳情載惟羊酪不似萼羹終焉
故國江水長清

張翰

筑筑魯望志履疎曠時謂散人自比元亮清不恥耕貧
不輟釀菰笠扁舟煙雲白浪皓首叢書焦心絕唱遺編

如新可見高尚

陸龜蒙

十二先生贊

宋史浩

蓬萊黃先生

商於六里肥遯四賢公居其間美行卓然時予一出羽
翼翩翩漢祚四百由茲卜年

大梅梅先生

堂堂偉人漢世之杰方時昏昏上書剴切退伏市門或
來明越我遊大梅尚想忠烈

石臺葛先生

公遊宇內蹤跡殆徧一月千江無處不見大隱石臺波
光如練出入丹林清可覲面

石窗賀先生

道既不逢去當勇決野服黃冠孰能羈紲鄞水烟波鏡
湖風月高標凜凜濯世執熱

大隱楊先生

道契皇王德參天地俯仰觀察出處一致三聘及時疾

驅遠避齊魯大臣公其無二

慈溪杜先生

猗歟高節抱道弗違下視流俗突梯脂韋荆國之清叩
其元微九原可作非公誰歸

甬水王先生

生負大才棲於甬水雖有聲名且無生理陋巷簞瓢王
公知己百世聞風莫不興起

西湖樓先生

翁臨西蜀一化南閩公以是教作成吾鄞逮今士子傳
學彬彬收功貽厥世有顯人

桃源王先生

公修隱德約處桃源文肩李杜行踵淵騫教育千里執
經滿門天之報施煌煌後昆

望春王先生

使者入境金橘是求公責以義彼實懷羞晚使作邑投
効歸休鄧城彭澤千載同流

湖西周先生

宦遊寡偶不如投閒言之孔易行則惟艱公乎勇退雙
鬢未斑葉月蘋風誰復追攀

奉化孫先生

朱梁僭竊公懷憤恥仕還民服年著甲子寥寥唐末有
茲義士遺編雖存惜無信史

八賢贊

宋王應麟

童判子

賢哉若人儒行塵蹟悌友祥順展也實德我興視世口
舜心跼居市不市前言匪激

蔣璿

學必以己義榮道腴博觀約守胃吞石渠良朋問疑詡
徑未蕪誰其似之子雲林閣

王茂剛

夢吞三畫韞玉山棲象外繫表捐筌棄蹄心學自得義
文與稽緒言不傳林深草萋

顧主簿

言行慥慥白賁素履忠信篤敬行乎州里其德如蘭薰
我晉鄙漢之長者周之吉士

李宗質

烝烝純孝其感以天昔朱今李盛事光前綵衣華髮介
以耆年孰補南陔彰善旌賢

李猷黃子游

信義之重死生如一求諸古人藥布脂習偉哉二士卓

行特立砥訓薄俗百世矜式

陳之翰

貴義如璧賤金如土不億不信莫予敢侮誠於為善君子所予彼晝攫者羞愧汗雨

東陽十孝子贊

明
宋 濂

十孝者皆東陽人其事載於郡乘為詳予讀書之暇因採其昊天罔極之思而為之贊以風世之為人子者

秦顏烏

古有純孝厥姓惟顏父喪未葬行泣道間我畚我鍤是
殮是瘞彼羣烏何知銜土予助我冢既封烏吻血流感
爾異類愧我同儔皇風日漓借耰鋤而德色誰意零雲
之四蒙忽當空見此曠日千載之下禮憲淪胥豈獨愧
君烏亦不如廟嚴嚴春秋是祀用興薄夫俱作孝子

吳斯敦

有孝者斯峴山之阿父罪當誅兒心奈何自非吾親曷

從生我我寧隕身父死烏可九關我我虎豹斷斷泣血
上書願易以身王用爾恤卒全父命更旌爾門風彼不
令池波瀾淪宰木扶疎清風肅然過者下車

晉許孜

嗟嗟許生實孝於親胡風水不停邁此難屯輶車既載
負土築墳我親我塋敢曰勸彼鄉民手胼足胝我不為
辛巾笥猶存几筵不改惕然念之吾親何在秋霜凝凝
春雨濺濺父兮母兮得無苦寒與饑兒既不可見寧能

不念茲天高可極此情罔極獨鹿不憫我觸我松柏嗟
嗟許生厲志不移終身之慕於子見之

唐馮子華

緬彼孝馮結廬墓傍思親不見欲與俱亡白日寥寥悲
風四起蒲伏號呼哀徹心髓天錫嘉瑞慰我孝思有皦
斯兔有燧斯芝孝馮曰噫吾焉用汝九京莫與百瑞奚
補惟爾孝子樹我世防雖歷萬祀厥德彌章自公之亡
肖公者幾茫茫堪輿孰非人子

唐應先

卓哉至行衆人所難眷我應君投涕洟瀾親之云亡中
心咽塞雖草生髮間何暇束櫛昔處膝下其樂泱泱今
我來思但見白楊彼蒼者天曷不我惻苟可從之我生
奚恤爾心之苦爾行之優雙闕峩峩卒承天休

唐唐君佐

唐氏之子以孝行聞生死一節弗岐弗分惟思親弗置
鞠明究贖誰無父母以樂以愉今我何罪獨行次且我

罪之深我宜隕墜胡獨使我親先彼朝露昊天不弔直至於斯渺渺音容如何弗思官用褒旌封章在舍匪私爾一人式勸來者

唐陳太竭

浦汭之內有氏曰陳親沒居廬哀麻終身心劬形瘵杖而後起一氣如絲去死無幾朝哭如吞暮哭尤不忍聞松風脩脩林鳥嚶嚶來助予之悲號遐思弗寧起奠我爵果肴在前烏鳥為之不啄世渚失防頽波滉漾我思

古人古人焉往

宋董少舒

有倬董君父以令終躬負厥土馬鬣其封四郊無人夜
寒如水黑飈潛興其臨如鬼董君出廬擁墳撫膺念父
寥寂長哀無聲日兮月兮能照下土寧不憫我拮据最
苦願亟入九泉奉我父母靈芝煌煌駿發爾祥蓋紫幹
黃於燧有光有倬董君德聲斯不忘

宋金景文

澱水之州三山之坡下有孝子孝如之何父疾在首顙
天請代願萃於身我親罔害母棺未窆執鑪以前天光
下燭五色燦然五色之燦未足為偉怪電殫風勿犯其
里苟匪中忱曷以臻此綿代是師於戲孝子

宋賈南金

孝道之弘百行所從誰與賈氏實敦古風生弗離親歿
安可棄忍令親之玉體為泉所閔晝雖不之見接以夢
寐夢中相見宛其未死覺後求之寒燈在几得不慨茲

潜潜墮淚眷爾孝德閔我章逢梔蠟其貌黼黻其躬父子相軋或不相容我述贊辭用發民哀

宋忠簡公畫像贊

明 蘇伯衡

公之力足以旋乾而轉坤公之功足以攘夷而安夏始以一言能返北旆而南還後以二十四疏不能回南轅而北駕且留鑰之任方切而巧言遽入於帝聰度河之志未酬而大星已殞於中夜何人之於公則知媚嫉而天之於公則不知假借此有志之士百世之下所以想

英風而激昂拜遺像而悲吒也

先賢贊

明
黃潤玉

大里黃先生公

商山逸老秦坑遺儒權時一出卒定漢儲紫芝罷歌黃
墓封土音容寥寥名高千古

中丞任先生奕

董子遺風人恬隱逸避秦逃漢終泯聲跡德輝日麗文
藻春榮名高位顯達哉中丞

仲寧虞先生喜

先君仕吳先生值晉三召不起孰知其蘊永操淵學海
度風襟丹青莫尚煥乎志林

侍中虞先生荔

學明王道文冠士林臺城阮運莫遂初心一弟仕陳永
雪同操二子興唐奎壁聯耀

文懿虞先生世南

家傳懿學宦顯明廷褒嘉五絕獻納一誠公生也榮百

年蓬瀛公歿也寧千載昭陵

秘監賀先生知章

夢遊紫府蟬蛻禁林風月觴咏雲水身心李仙夜郎杜
老西蜀賢哉先生鑑湖一曲

大隱楊先生適

羽翼漢嗣賓客唐儲黃魁四皓賀踵二疏道在先生不
疏不皓宋爵莫羈四明一老

慈溪杜先生醇

先生有道不求人知耕漁養親德行可師
鄞慈建學荆公起之二邑文風大盛於斯

鄞江王先生致

天佑先生富道而貧妻收遺種子拾墮薪
遯世憂民介甫稱仁左楊右杜鼎峙吾鄞

正議樓先生郁

仁乎正議簞瓢屢空春風鄉校時雨名公
晚遺祿養邈爾雲鴻本支百世子孫其逢

桃源王先生說

鄞江嫡傳尊稱桃源光啟書院宸翰昭宣媲美四賢鄉
祠赫赫流慶後昆君子之澤

清敏豐先生稷

水衡之歌始慰穀城章蔡之疏終忤祐陵正大之學貞
勁之節元祐一網崇寧一轍

殖德林先生暉

事親而孝與人而忠明於知德終始了翁紹興鑒宇首

捐萬金祀公於學天理人心

特進林先生保

贊政帥幕活殍實多遠跡權門立朝幾何中興龜鑑帝
心允惻鄉飲酒禮天下是式

憲敏高先生閌

卓乎憲敏受學龜山名和之對君心之間忤時東歸推
衍麟史文獻相承亦有孫子

萬竹高先生元之

五舉不第授業門人九騷見志廬墓終身萬竹森嚴萬
卷沉酣實多著述允矣茶甘

忠定史丞相浩

學明天人四十始仕善政嘉猷允光青史上而八行下
而三相承緒惟公賢者氣象

文節魏學士杞

公在南宋名德煌煌使金似弼相國猶光陶徑未荒潘
輿是悅觴政詩郵碧溪風月

文靖舒先生璘

先生之學自陸而朱融會貫通卒為大儒美境佳趣風
雨漱牀師模後進煦然春陽

端憲沈先生煥

偉哉端憲本於躬行師道尊嚴郡國是倡曰道與職惟
一無二任重道遠名昭百世

慈湖楊先生簡

慈湖啓教象山是宗一誠貫徹萬象昭融臨民若神處

已即易巍然祠宮四方是式

正獻袁先生變

有鄴儒族自高而玄道隆正獻裕後光前笙鏞著述天地其心魯無君子後學奚欽

敷文汪學士大猷

孩提講經客訝秀穎耄耄休官賜謚莊靖惟時學士一舅二甥風節酷似有光四明

文懿陳學士居仁

公之事功先定大計公之文章首見兩制委蛇鳳池前
父後子世綸名堂光賁來嗣

宣獻樓學士鑰

隆興擢第歷事三宗初陳黨禍卒忤奸雄飄然居閒晚
登台位行已大端淵乎攻媿

迂齋樓先生昉

先生之文汪洋淵永援據典確風止水靜沂其體裁源
自東萊黼黻文治雲漢昭回

正肅袁先生甫

巍巍正肅作聖有功擢魁嘉定蹇蹇匪躬禽鳥春風子
樂攸同高山景行允矣儒宗

深寧王先生應麟

春秋絕筆瑞應在麟宋祚訖錄瑞應在人尼父泣麟先
生自泣出匪其時吁嗟何及

文潔黃先生震

仰惟宗人生值宋季程朱是師今古畢記尊其所聞行

其所知逢時孔艱厥德普施

進士袁公鏞

確乎其誠浩然其氣通貫神明充塞天地一身成仁闔
門死義孤忠奇節光昭後世

剡原戴先生表元

有宋遺老避世投閒先生穎出薰陶其間商鼎周彝古
雅清奇規模後學望重當時

松鄉任先生士元

純乎先生炳乎文章講道吳越納交公卿鬱鬱松鄉飄
飄松雪出處雖殊歲寒一節

文清袁先生楠

四明文獻宋斯唐虞在元宦達惟公一變祖孫勝賞有
堂有像流水高山吁嗟絕響

畏齋程先生端禮

考亭鳴道先生有傳塤倡箎和伯仲後先佐王之才希
聖之學四方仰之二程出洛

奉川陳先生楹

煌煌列祖繩繩進士風節蟬聯卓冠宋史先生父子家
學有傳千載直筆通鑑續編

象山錢尚書唐

飛龍在天見龍在田千載際遇四方晏安輔翼斯民閑
衛斯道生死以之國朝一老

長史桂先生彥良

沉霧晦冥元豹藏形太陽朝升丹鳳斯鳴窮隱書堂達

登上相際遇有時大儒德行

忠襄金尚書忠

時窮則隱時通斯貴惟幄有功考終祿位居不甲第墓
不穹碑生順死安前戒後規

名宦贊

明
黃潤玉

越大夫文公種

飄飄鳬鷗五湖扁舟遲遲桑梓一劍屬鏤長頸烏喙隆
準龍顏功名之際古今所難

刺史黃公晟

四海擾攘公奮於鄉姻錢斃董城保一方梁帝唐哀納
土錢王一坏宿草百世流芳

知郡李公夷庚

郡有鄉校開元之詔公在天禧定學遷廟左壇右宮絃
誦颯颯英才輩出翳公之功

忠肅陳公瓘

視日不瞬知其向君乘舟莫諭知其敗羣責沈有文愧

不識程尊堯有集嚴乎闢荆

制置仇公愈

建炎兵燹城復於隍獨存禮殿歸然靈光捐俸給田漸
還舊貫公之德星奎壁輝煥

忠定鄭公清之

天啟穆陵公與有功端平之政四方嚮風建節鄉邦增
光學校書院祀師有裨名教

郡守王公璉

國之遺老時之清臣政教兩盡風俗一新富貴不淫患
難奚恤神明其心始終厥德

郡守鄭公珞

仲弓之資仲由之學堯尊五美端屏四惡士安於業民
樂其生頌聲洋溢沒世不忘

辭

懷忠堂辭

并序

宋王炎

顏魯公知湖州作放生池刻碑池上其碑現存碑畔有

魯公祠堂題曰懷忠北山程公作楚辭一章刻石廡下其辭甚古然未盡事實因以辭續之辭曰

跂逸駕兮前修佩武符兮典州迹已陳兮德新可敬而可慕兮幾春秋意其存兮閔於萬年之原謂其逝兮乃在羅浮之巔奮忠貞兮取義貫義娥兮爛然隘塵寰兮上征揮八極兮為仙黃鵠脫驂兮素蚪停駟幾弭節兮合遺命而來顧高弁蒼蒼兮清苔瀾瀾公來遊兮湖山增美遊觀罷兮來歸有浦與河兮清冷之池魚鳥懷生

分欣欣焉其有依銀鈎蠅尾兮燦翠珉而陸離絃琴兮
擊鼓羞羔豚兮酌醕跪起以薦兮願公燕喜公燕喜兮
吾民樂康却災沴兮蠲除不祥雲來兮萬祀蒸嘗兮不
忘

思嬾人辭

并序

明
宋 濂

吾鄉呂成公實接中原文獻之傳所學弗畔於孔子之
道欲學孔子者必自公始公骨雖朽著書猶存古有曠
百世而相感者況與公相去如此之甚近乎聞而知之

必有其人托物引類作嫩人辭辭曰

惟嫩人之惜嬌兮賦姱質於自然修蛾規而凝黛兮曼
目轉以成聯安鬢髮而如雲兮歷輔巧以承顴纖腰秀
頸若鮮卑兮容都曼而體便娟寶璐縈而右繞兮桂徽
墜以半偏懸明月以綴佩兮錯水難而傳冠向瑤臺而
微步兮意澹靜以貞閒交妃折芳馨以相遺兮復容與
乎江干勢翩翩其褰舉兮若游龍之在淵胡人間不可
以久留兮遂凌穹乎高寒馮道紀以為御兮鍊天和而

為飡徑驅馭於陽陰兮時上下乎星辰歎予生之何晚
兮不一覩於芳儀念姱嫻之鮮雙兮遡迴飈而曾思歛
愁悴而委情兮氣溶滯以如炊道苟可以選之兮視萬
里猶門墀登嶇嶮而騁望兮正晨遡之蒼涼氣曠豁而
閶闔兮莽山川之縱橫樹輪盤斜而傑虎兮蘋草霍靡
以相望豐狐思羣而永嗥兮文鵠慕類以徐翔企精爽
之不徠兮空雲龍之將將蹇佗傖而望絕兮曜靈習其
西藏降崇邱而臨曠野兮循故轍以東歸向闌楯而徙

倚兮境外嬰而愁內滋新蟾皎以出天兮想纖美之曲
眉繁星爛而成文兮懷繡帔之陸離蒼灝霏落而無滓
兮思玉體之弗緇拂蘭袖而起步兮復經緯乎穴庭苦
鴻雁之雖離兮厭習蟲之薨薨撼戶櫟以悲惻兮惕厲
容而弗自勝轉曲牖而入堂壇兮牀獨坐對乎華燈燈
影搖曳而如鳥旌兮象中心之靡寧寒庑狺狺而競吠
兮耳恍聞於楚音疾倒屣以啓關兮飈鬪葉於枯岑縹
綿綿而莫抒兮托幽寄於瑤琴聲鳴咽而思深兮類孤

鶴之鳴陰更寂寞以將闌兮斗杓旋而向東舒枕衾而
就榻兮期夢寐以潛通精氣注以弗釋兮橋有物而衡
中息纚纚以方微兮魂翕翕而上征造旬始而謁太儀
兮羣靈續其若鼓氣旄溶以隨焱兮鳳旂沛而嬰空馭
象車而乘虬節兮鞭列缺以斥豐隆豹纛熊幡聿皇以
奮兮穆流紆譎鬱以相蒙左撫右衛動以彌環兮倏伸
倩泚雲瀚而雷春回穴幡纚汨以焮歛兮吸呷瀟率藹
以蒙鴻穆眇眇以前邁兮翩紛紛而弗止莽冥冥以無

垠兮勢皇皇而迪靡超氛埃而淑郵兮竟按轡乎朱陵
長麗舉嚼以向日兮有赫氏之華文揚芒燥以上焱兮
粲重離之丹門炫赤玉之寶章兮列八龍之威神歛東
趨於蒼極兮青瑤紛其並迎羣仙衍衍以方饗兮奏靈
和之鳳笙四酬芬而凍歆兮暈玉色而帶頰揖素威以
升皓宮兮盼四極之浮浮蓐收顧余而破顏兮錫鏤瓊
之華鈎謂貞白以自守兮合左契於伊周折寒門而燭
元冥兮朔風颼颼以吹裘有夫元巾而擐甲兮握靈光

以為驅重陰互而未啓兮肅元氣之幽幽四方非不可
居兮悵所思之莫余都馳兩轂如飛九兮又滔滔而遐
逝靈氛告余以吉故兮子何為兮獨悲若彼中天之有
居兮隔人世之風雨吾將導子之一至今庶弗愆於恒
素怡恍惚以從之兮駕剛飈以徑度冒光炎之炘炘兮
絢纚鬱決而不可正視瑠瑯彤楹屹以上起兮瀏濫弘
恔雲譎而波詭連卷櫬倏沓以軋芴兮歲魁幼眇直矗以
高峙中洞房之沕穆兮乃媿人之幽居使曷姬為予通

訊兮儼再拜乎堂垂習朱扉之洞開兮移玉趾之委蛇
珠明玉潔不足以為喻兮光照耀乎東西吐芳辭以若
蘭兮意勤勤而告余曰皇降靈兮昭質弗沫毋染爾穢
兮昧厥施紉葯襦兮曳蒞旆結蕙纓兮張椒幃勺桂漿
兮嚙蓀麋索胡繩兮畦揭車集衆芳以遠蒸兮羗郁郁
而斐斐余俯首而敬聽兮書鞶紳以自規海色動而報
曙兮陶去幽而開寤雖嘉辭之盈耳兮邈若人其何處
遂捫膺以沉思兮顓獨處而繚戾也誠因言以會心兮

將神交於千載也亘天地而無初終兮惟我民之秉彝
道弘敷於上下兮必有人而繫之往者固不可作兮幸
方冊之昭如日參驗於厥躬兮若面命而耳提跼蹐之
嬖姍兮固難齊於六驥能孳孳而弗怠兮亦千里之可
至余雖質驢而力單兮敢不沾沾而奮厲帶鈎矩而佩
衡兮撤蔀蒙而祛尉期有形以必踐兮始俯仰其無愧
縱不得媿人以與之遊兮又何異同功而並世

青山辭

明宋濂

青山崔崔白雲溶溶我疑其中仙人所宮風馬雲輿霓
旌羽幢游行太空翩然相從望而不見使我心沖我本
金華牧羊之童口頌藥笈有聲如鐘震撼巖壑無礙不
通謫居下土黃塵濛濛五色之文布滿西東秋高露清
陟彼危峰呼吸元氣精神內融嘯傲萬物後天而終

雜著

五洩山水志

明宋濂

五洩山在婺杭越三州境上北距富春南據勾吳東接

浦陽其山水最號奇峭齊謝元卿常以採藥深入其中而宋刁景純吳處厚亦頗遊焉自西坑嶺入過遇龍橋北行二十步始入西潭前橫一溪水甚寒履之如冰由溪而前徑小潭傍有巉石突起類大甕斜覆乃捫石而登一失足輒墮又行二里所地稍夸曠怪石四瞰峰巒環列獻狀其紋縈縈然類神工鬼斧所雕刻者山多猴遊人或恐之撒石亂下如雨又前行半里所泉自石竇中出瀏瀏作聲若琴若笙竽泉西流匯為小窪瑩澈泓

澄毫髮不隱鯨魚數尾洋洋往來如行琉璃瓶中見人
至潛去窪左大樹離立極怪偉倒影入水中如畫又前
行五十步大石關道相傳有巖角肖鷹喙忽夜大雷雨
喙崩下聲聞二十里又行三十步榛篠成林翠光浮映
衣袂成碧色山蟲崖虺奔繞後先瞬目失所在至此則
氣象陰幽絕不類人世如升蓬嶠坐水晶宮生平烟火
氣消盡又自山腰緣葛而前竹籜覆地積厚動足輒仆
又過十步許抵小潭小潭上曰西潭流水傾沫成白簾

澗可七八尺冉冉下注滑而無聲兩旁石崖峭立苔蝕
蘚暈時有水珠毵毵滴下歲旱鄉民禱龍於此遇禱時
或湧取蜥蜴入瓶盂中持以歸多驗自遇龍橋至此約
可五里皆蛇盤磬折路行若窮又復軒豁其中勝致
難得其述或言潭上有石河從石河至三臺塔人跡罕
至莫詳也尋徑路而出斜迤而東過香爐峰峭拔上有
石類香爐故名香爐北有峰圓而童名鉢盂峰或曰肖
東甌雁蕩又名雁蕩峰遵雁蕩而南時有白雲覆於谷

者曰雪峰屹如人立者名玉女峰嶰嶰勢欲柱天者名
天柱峰其他諸峰星聯肺附登名圖籍者蓋七十有二
焉復從崖東折度略約趨三學士院院唐靈默禪師道
場師常降龍於此遺跡尚存由院北深入又百餘步至
東潭潭上飛瀑可二十丈怒瀑倒擊崖竅中若運萬斛
雪從天擲下白光閃閃奪人目睛至潭底輒復逆上有
聲如輶雷人笑語咫尺不能辨猶聞壑中聲居人云每
天風一號四山林木震撼欲折黑雲下罩杳不知昏曉

歲多禱龍者其多驗如西潭復北折而西沂潭之源登
響鐵嶺度紫閭山村人多舍簞葦間有平臯數百畝可
耕溉傍沿石河又行一里所地名石鼓足頓之瑟瑟然
越十步至第一潭潭如井睨之正黑投以小石鏘若佩
環又越十餘步至第二潭圓如錡釜面廣而底敞大水
驅亂石聚其內迨滿復洩去潭下石壁百餘尺險不可
寘足從其右懸藤墜下至第三潭潭甚深以線繩之下
不見底其形方狹而長天向陰常有雲氣從中起疑有

蛟龍潛其下人恒以幽悄為病第四潭咸不敢往或有
以絢圍腰繫巨杙俯崖而瞰潭左右皆楓木其形大槩
如第二潭而廣袤倍之側有晉劉龍子墓相傳龍子常
釣於潭得驪珠吞之化龍飛去後人為壘石作塚或曰
龍子之母葬焉世遠不可辨又其下至第五潭即東潭
因其水五級故名之為五洩云噫造物之委形山水者
其奇峭有是哉

問士對

三國吳

朱育

孫亮時有山陰朱育少好奇字凡所特達依體象類造
作異字千名以上仕郡門下書佐太守濮陽興正旦宴
見掾吏言次問太守昔聞朱潁川問士於鄭名公韓吳
郡問士於劉聖博王景興問士於虞仲翔嘗見鄭劉二
荅而未覩仲翔對也欽聞國賢思睹盛美有日矣書佐
寧識之乎育對曰往過習之昔初平末年王府君以淵
妙之才超遷臨郡思賢嘉善樂采名俊問功曹虞翻曰
聞玉出崑山珠生南海遠方異域各生珍寶且曾聞士

人歎美貴邦舊多英俊徒以遠於京畿含香未越耳功
曹雅好博古寧識其人耶翻對曰夫會稽上應牽牛之
宿下當少陽之位東漸巨海西通五湖南暢無垠北渚
浙江南山攸居實為州鎮昔禹會羣臣因以命之山有
金木鳥獸之殷水有魚鹽珠蚌之饒海岳精液善生俊
異是以忠臣係踵孝子連閭下及賢女靡不育焉王府
君笑曰地勢然矣士女之名可悉聞乎翻對曰不敢及
遠略言其近者耳往者孝子句章董黯盡心色養喪致

其哀單身林野鳥獸歸懷怨親之辱白日報讐海內聞
名昭然光著太中大夫山陰陳囂漁則化盜居則讓鄰
感侵退藩遂成義里攝養軍姬行足厲俗自揚子雲等
上書薦之粲然傳世太尉山陰鄭公清亮質直不畏強
禦魯相山陰鍾離意稟殊特之姿孝家忠朝宰縣相國
所在遺惠故取養有君子之謨魯國有丹書之信及陳
宮費齊皆上契天心功德治狀記在漢籍有道山陰趙
畢徵士上虞王充各洪才淵懿學究道源著書垂藻絡

繹百篇釋經傳之宿疑解當世之槃結或上窮陰陽之
奧秘下據人情之歸極交趾刺史上虞綦母俊拔濟一
郡讓爵土之封決曹掾上虞孟英三世死義主簿句章
梁宏功曹史餘姚駟勲主簿句章鄭雲皆敦終始之義
引罪免居問卜督盜賊餘姚伍隆劄殍侯主簿任光章
安小吏黃他身當白刃濟君於難揚州從事句章王修
委身授命垂聲來世河內太守上虞魏少英遭世屯蹇
忘家憂國列在八俊為世英彥尚書烏傷楊喬桓帝妻

以公主辭疾不納近故太尉上虞朱公天姿聰亮欽明
神武策無失謨征無遺慮是以天下義兵思以為首上
虞女子曹娥父溺江流投水而死立石碑紀炳然著顯
王府君曰是既然矣潁川有巢許之逸軌吳有太伯之
三讓貴郡雖士人紛紜於此足矣翻對曰故先言其近
者耳若乃引上世之事及抗節之士亦有其人昔越王
發醫讓位逃於巫山之穴越人薰而出之斯非太伯之儔
耶且太伯外來之君非其地人也若以外來者言之則

大禹亦巡於此而葬之矣鄴大里黃公潔已暴秦之世
高祖即阼不能一致惠帝恭讓出則濟難徵士餘姚嚴
遵王莽數聘抗節不行光武中興然後俯就矯手不拜
志陵雲日皆著於傳籍較然彰明豈如巢許流俗遺譚
不見經傳者哉王府君笑曰善哉話言也賢矣非君不
著太守未之前聞也濮陽府君曰御史所云既聞其人
亞斯已下書佐寧識之乎育曰瞻仰景行敢不識之近
者太守上虞陳業潔身清行志懷霜雪貞亮之信同操

柳下遭漢中微委官棄祿遁跡黜歛以求其志高邈妙
蹤天下所聞故桓文遺之尺牘之書比竟三高其聰明
大略忠直蹇諤則侍御史餘姚虞翻偏將軍烏傷駱統
其淵懿純德則太子少傅山陰闕澤學通行茂作帝師
儒其雄姿武毅立功當世則後將軍賀齊勲成績著其
探極秘術言合神明則太史令上虞吳範其文章之事
立言粲盛則御史中丞句章任爽鄱陽太守章安虞翔
各馳文檄畢若春榮處士鄧廬叙弟犯公憲自殺乞代

吳寧斯敦山陰初庾上虞樊正咸代父死罪其女則松陽柳朱永寧瞿素或一醮守節喪身不顧或遭寇刼賊死不虧行皆近世之事尚在耳目府君曰皆海內之英也吾聞秦始皇二十五年以吳越地為會稽郡治吳漢封諸侯王以何年復為郡而分治於此育對曰劉賈為荊王賈為英布所殺又以劉濞為吳王景帝四年濞反誅乃復為郡治於吳元鼎五年除東越因以其地為治并屬於此而立東部都尉後徙章安陽朔元年又徙治

鄞或有寇害復徙句章到永建四年劉府君上書浙江之北以為吳郡會稽還治山陰自永建四年歲在己巳以至今今年積百二十九歲府君稱善是歲吳之太平三年歲在丁丑

越問

有序

宋孫因

莊烏越人也仕楚而為越吟夏統越士也入洛而為越唱越俗之好吟咏其來尚矣亦聞有大述作者乎蘭亭有序修禊事也金庭刻銘愛輕舉也康樂山居

之賦陶性情也微之妙宅之詩寫物景也若是者謂之大述作可乎曰未也若昔河東柳先生蒼萃二河之遺事網羅千古之異聞作為晉問以昭來世斯文也可謂大述作矣先生晉人也居晉土習晉事為晉問職也晉有堯之遺風不可以有加矣居乎越者亦知越之事可與晉方駕乎晉堯都也越舜禹之邦也古有三聖人越兼其二焉加以種蠡之所經營王謝之所棲隱司馬遷李太白杜少陵之所游覽以至國

朝諸名賢之所流咏班班可考而大述作未聞也惟
紹興間狀元王公以幕府元僚援筆作賦搜奇抉異
雄麗卓偉雜用二京三都晉問體蓋自有會稽以來
之大述作也然嘗熟復詳繹其間猶未能無遺恨焉
何者越之四封最為廣袤南踰句無北畛禦兒東至
於鄞西盡姑蔑至後漢時提封尚數千里今之越雖
非昔之越然都督一道封疆猶不為狹而斯賦所錄
止及境內之山川此其遺恨一也會稽土地所宜以

金錫竹箭為稱首職方氏九牧之貢莫先焉蓋金錫
竹箭戎備所資非其他一草一木比正當表而出之
而是賦所述乃雜舉夫杭秫桑蠶楓松桐梓雞頭鴨
脚馬乳鳧茨木蘭梅榴園蔬木菌之屬他郡獨無之
乎此其遺恨二也並海魚鹽之饒東南大計仰焉柳
河東晉問於魚鹽二物各為專條以侈其富饒鋪張
揚厲無慮數百字彼三河所出尚未敵海藏之什一
也茲賦纔一語及之往往纖悉於赤鯿黃頰之族而

闕略於縱壑之巨鱗搜羅乎餘糧石英之品而簡棄
夫積雪之寶鹽此其遺恨三也紹興之初翠華巡幸
駐鳴蹕者彌年實履舜禹之故迹陞州為府冠以紀
元且嘗就行殿舉大亨禮中興之業於此乎濟可謂
是邦曠絕之盛典而茲賦俱不之及此其遺恨四也
然自有越以來所謂大述作者獨此一賦而已王公
作賦後五十七年有書生孫因自句章徙餘姚逍遙
鹿亭樊榭間處越土為越民飽越飯酌越水每欲補

越絕之所未載廣越賦之所未備而未能也又九年
帥憲新安汪公衣繡衣持玉節森畫戟載朱幡臨制
七郡四十二縣臺府多暇百廢俱興輪奐恢闔山川
改觀鯁生幸覲盛事竊謂越為大都會公有大規模
以其大學問大力量寓於大建立大設施中興百年
所未覩也獨無大述作可乎宗工鉅儒之記述騷人
過客之題咏金石震耀黼黻周張韶鳴篳篥宮唱呂
和所謂述作亦一時之盛矣使張平子左太沖柳河

東諸人見之將曰此大規模也談何容易他郡小小
創置裁革則伐石為一記濡墨為一詩足矣獨施之
越則不可越舜禹之邦也牧是邦者舜禹之臣也而
可易言之乎愚不敏成越問一篇釐為一十五章凡
三千九百五十字借楚辭體而去其羌詭謬佗之聲
倣晉問意而削其詰屈聱牙之製非足以發揚會稽
之盛庶幾附郡志之末云

典午氏之盛時兮余鼻祖曰子荆謀樂郊以隱居兮颺

漱石之清名有聞孫曰承公兮嘗令鄞與餘姚愛會稽
之山水兮爰徙家於茲城當永和之九年兮惠風暢夫
春莫偕王謝之諸公兮會修禊於蘭亭賦臨流之五言
兮寄幽尋之逸興泛迴沼倚修竹兮松風落而泠泠維
興公尤好事兮作流觴之後序助逸少之高致兮齊芳
譽於難兄既乃登陸而游兮歷天台與四明漱飛瀑於
筆端兮遺擲地之金聲余自句章而徙姚兮倏綿歷乎
十稔慨風流之浸邈兮幸猶為夫越氓掬清泉之潺湲

兮友過雲之溶洩訪樊榭之杳靄兮棲石牕之瓏玲客
有過余兮謂余博覽而好古世為越人兮胡不志夫越
之風土余謝不能兮偃余指而縷數前有靈符之記兮
後有龜齡之賦嗟彼皆已為陳迹兮時亦隨夫所遇儻
含毫而不斷兮將羞余之鼻祖

右篇引

九州皆有山鎮兮職方氏獨先會稽射祥光於斗兮兮
占星紀於天倪牽牛炳其初躔兮屆須女之七度少陽
當其正位兮為萬物之潔齊南控引乎閩粵兮北連亘

乎鉅海日出扶桑之隅兮風行浙河之西八山蜿蜒其中
蟠兮羅千岳以為障三江匯而旁注兮渺萬壑以為谿
洞天崕岬以連雲兮俯九垓其如芥洪濤沸渭以拍天
兮轟三軍之鼓輦宅卧龍之峒堯兮蠡城屹其環繞帶
平湖之浩漭兮雲鏡鑄而天低闢陵門而四達兮八風
颯其遞至飛翼樓而舞空兮天門沈其可梯提封方數
千里兮運甌吳於掌上七郡四十餘縣兮歸中權之總
提茲古今之大都會兮為九牧之冠冕諒天地之設險

兮他郡寧得而攀躋客曰偉哉山川之信美兮其無慊
然吾聞固國兮不以山谿之險

右封疆

觀地之所宜兮惟金錫之最良貢品肇於有姁兮暨蒼
姬而加詳雖歷代之所珍兮凜英氣其猶秘歐冶子之
神奇兮爰採取而鍊淬剖赤堇而出錫兮山色變而無
雲涸若耶之銅液兮俯不見夫潛鱗鑄嶺岌其插天兮
冶井浸而寒冽前豐隆為擊橐兮後雨師為灑塵發銅
牛之藏屑兮赭林麓以炊炭弃右冶之餘滓兮草木為

之焦爛炎煙漲乎銅孤兮寒光浮乎鍊塘越砥妥其斂
鏐兮鑄浦沸其若湯合衆靈而成器兮爲寶劔凡有五
曰湛盧與巨闕兮蓋珍名之最著既屬之善相之薛燭
兮復謀之南林之處女水試則斷蛟螭兮陸用而剗犀
虎掃撓槍使澌滅兮伏蚩尤使奔怖豈吳鈎之敢抗兮
非燕函之能禦客曰偉哉利器兮誠爲越國之珍斯劍
客之喜談兮非文種之願聞

右金錫

維苗山之竹箭兮稟勁氣於乾坤實東南之美材兮聲

價等乎瑤琨良工相夫陰陽兮加利鏃以為矢習國人
於射瀆兮震電激而星奔挾之以六千之君子兮從之
以八千之子弟可以償方張之闔閭兮走善射之樓煩
彼羣仙之會聚兮亦以射而為樂登石室之射堂兮射
東峯而的白丁令威為拾箭兮山上下以求索獲遺鏃
於樵夫兮償以樵風之南北客曰異哉斯事兮誠振古
之怪竒然越人之彎弓兮則談笑而道之

右竹箭

百川會同滄海兮浩不知夫津涯吐雲濤以瀾汗兮沃

日御而渺瀰藏巨靈之鼎願兮見天吳之惚恍戴五山之業哉兮涵百怪之陸離巨魚出沒其中兮不知其幾千里鼓浪沫以成霧兮噓雲氣以成霓任公子之投竿而釣兮五十牯以為餌閱期年而得魚兮牽巨鉤而下之鬚鬣怒而刺天兮白波湧而山立膏流溢而為淵兮顛骨積而成坻自浙水以東兮無不饜若魚之肉彼赤鱣黃頰何足數兮又況梅魚與桃鮐維天地之寶藏兮有煮海之醢鹽曝曜靈以捭沙兮浮蓮的以試瀣編簞

簫以為樂兮處烈燄而不灼霜鈆倏其凝沍兮雪花颯
其的皦茲海若之不愛寶兮豐功被乎天下抑造化之
自然兮詎人為之力假客曰富哉魚鹽兮此越國之寶
也是特以利言兮吾願聞其上者

右魚鹽

越人生長澤國兮其操舟也若神有習流之二十兮以
治吳而策勲尋笠澤以潛涉兮北渡淮而盟會擅航鳥
之長技兮水犀為之逡巡浮海救東甌兮有握節之嚴
助治船習水戰兮榮衣錦於買臣渡浙江而誓衆兮會

稽之內史率水棹以拒戰兮凌江之將軍坐大船若山
兮公苗山陰之傑汎波襲番禺兮季高永興之人想萬
艘之並進兮紛青龍與赤雀風帆倏忽千里兮駕巨浪
如飛雲兮競渡其遺俗兮習便駛以捷疾觀者動心駭
目兮相雜襲如魚鱗客曰盛哉舟楫兮他郡孰加於越
然同濟或不同心兮請置此而新其說

右舟楫

揚州之種宜稻兮越土最其所宜稌種居其十六兮又
稻品之最奇自海上以漂來兮伊仙公之遺育別黃秬

與金釵兮紫珠貫而纍纍酒人取以為釀兮辨五齊以
致用滑鏡流之香潔兮貯秘色之新甕助知章之高興
兮眼花眠乎水底值謝傳之雅游兮陶丹俯而哦詩集
羣賢以觴詠兮浮罰觥乎子敬指鳴蛙為鼓吹兮暢獨
酌於稚珪斯越酒之醞藉兮非宜城中山之比矧投醪
之醇德兮能使勇氣百倍於熊羆客曰旨哉越釀兮固
越俗之所怡然自征權之法行兮安得薛戎而蠲之
右
越釀

日鑄山之英氣兮既發越於鑄耶地靈洩而不盡兮復
薰蒸於草茅雖名出之最晚兮為江南之第一視紫筍
若奴臺兮又何論乎石花維瑞龍之為品兮與此山以
相亞意山脈之貫通兮仙種同乎一家汲西巖之清泉
兮松風生乎石鼎滋芳液於靈襟兮沆瀣集乎齒牙歐
公錄之歸田兮蘇仙流諸佳咏伯玉註於詩版兮文正
賞其甘華至雁塔與花鴈兮固郡志之所載若餘姚之
瀑布兮尤茶經之所誇嗟陸羽之不逢兮宜鑑味之絕

少世方貴夫建茗兮孰有知夫越茶客曰世非不知兮
顧茗禁之已苛亦幸其不盡知兮姑舍是而言他

右越

茶

緊剡藤之為紙兮品居上者有三蓋篠簜之變化兮非
藤楮之可參在晉而名側理兮儲郡庫以九萬曰姚黃
今最顯兮蒙詩翁之賞談加越石以萬杵兮光色透於
金版近不數夫杭由兮遠孰稱夫池蘭半山愛其短樣
兮東坡嗜夫竹展薛君封以千戶兮元章用司筆硯數

其德有五兮以鎮滑而為首發墨養筆鋒兮性不靈而
耐久惜昌黎之未見兮姓先生而為楮使元與之及知
兮又何悲剡藤之有客曰嫩哉越紙兮有大造於斯文
然世方好楮而玉兮又烏知乎此君

右越紙

陽明太元之天兮乃羣仙之所游有金堂與玉室兮挹
方丈與瀛洲伯經得道泉兮乘雲氣於木杪仙公韜光
丹井兮發函書於船頭騎青驃以入市兮薊子訓之賣
藥切鯢魚以作鱠兮介元則之垂釣弘景寄跡釣槎兮

隱吏棲於梅市廣信駕龍白日兮羽人萃於丹邱擷芝
草以為侶兮左元放之金液餐桂屑而飲水兮范少伯
之扁舟煉日精以回形兮虞翁色若嬰孺位上清而標
籍兮思元跡混俗流嚴青能服石髓兮終斷穀而輕舉
伯陽煉成神丹兮雖蛻形而不留御天風而上征兮與
日月以齊壽皆地勝之所招兮舉塵寰而少仇客曰神
仙信有兮特秘怪而難求吾聞越多隱君子兮試詳言
而旁搜

右神仙

謝隱士當少微兮精神見乎天文嚴子陵應客星兮光
芒動夫至尊居剡下以高潔兮戴安道之父子游嵩嶽
以偕隱兮孔述睿之弟昆郤米餉而不受兮朱百年之
夫婦愛肥遯以就閒兮阮萬齡之祖孫閑蓬戶以觀書
兮淳之棲於乳岫輕白壁而不盼兮景齊隱於日門扣
藥船而引聲兮歌競傳於仲御漁鏡湖以賦詩兮島尚
號於方干黃公列乎四皓兮成定儲之羽翼嵇康儕於
七賢兮著養生之至言王子猷詠招隱兮愛山陰之竹

種謝靈運賦山居兮采地黃與溪蓀着貂裘坐巖石兮
弘之志不在釣袍豹席與樓櫺兮志和豈羨夫回軒彼
皆不事王侯以高尚而辟世亦地氣之所鍾兮多秀水
與名山客曰士各有志兮斯固古之逸民夫何欲潔其
身兮弗念君臣之大倫

右隱逸

昔勾踐兮思報吳問國政兮五大夫辟田野兮實倉府
訪疾苦兮字幼孤抱冰兮握火置膽兮坐卧采蕺兮與
葛側席兮闔左觴酒豆肉兮必均其施樂不盡聲兮食

不致味驚鳥匿形兮踰二十祀吳無稻蟹兮越有地利
一朝興師兮三戰得志姑蘇既墟兮橫行淮泗伯東諸
侯兮賀貢畢致赫然雋功兮又何可議客曰異哉兮彼
長頸而烏喙如其可與共樂兮何鴟夷之遠避

右勾踐

帝舜生於姚邱兮地近夷而居東母握登感天瑞兮漾
祥光於大虹歷山其所耕稼兮陶漁皆有遺迹二女降
於媯汭兮百官備而景從大禹巡於鬴山兮會羣臣而
計功執玉帛者萬國兮戮後至之防風託菲飲以名泉

兮鑿了溪而宅工發金簡於不匱兮藏秘圖於山中望
邑名夫虞姚兮山靈護夫禹穴儼廟貌於千古兮遺化
被於無窮繫帝王之所在兮宜風俗之近古習孝悌與
勤儉兮亦好遜而尚忠客曰於戲大哉兮又何可以比
隆然有為者亦若是兮豈無與舜禹之事同

右舜禹

維六飛之南渡兮潢濤江以東歷後舜禹三千年兮履
舜禹之遺跡駐翠蹕以彌年兮因改元而頒詔爰陞州
為府兮冠紹興之大號舉大享之上儀兮即行闕而歲

祀視總章與重屋兮亦庶幾其遺意登堂而望稽嶺兮
懷克勤之令德留建炎之御製兮彰復古之素志采上
虞之囊封兮終然法乎舜禪山鬱葱以蜿蜒兮鍾禹陵
之佳氣御香四時來下兮道冠蓋以相望拱觚稜於雲
闕兮儼威顏而天咫繫百年之父老兮及親逢乎盛事
想天民之視阜兮與虞夏而同治客曰幸游舜禹之邦
兮復逢舜禹之君然儻無舜禹之臣兮孰能收舜禹之

民
右駐蹕

自大駕之西幸兮府遂為於近藩賜行殿為府治兮暨
擇牧之惟艱張毘陵首當是選兮實股肱之舊弼仍土
階之素規兮因舊宇以為安朱忠靖繼剖符兮屹具瞻
於巖石趙忠簡亦相望兮凜清風而獨寒忠定王之來
鎮兮當乾道之四禩捐帑以置義租兮闢宮而祠先賢
諒棠陰之蔽芾兮思召伯其如憇宜大封於是邦兮良
天道之好還後五十餘年兮誰儼美以增飾維我新安
公兮騫逸駕而獨攀剖滯訟如澌流兮名雨暘如應響

使百城俱案堵兮令滄海無驚瀾立吏瞻於秋霜兮洽
民氣於春澤出干將於寶匣兮照沆瀣於銅盤園扉鞠
為茂草兮麥岐藹其連秀令修戶庭之內兮民樂湖山
之間既修政而人悅兮文書省於幙府新百廢以具興
兮聳輪奐之偉觀八邑不知有役兮一道不知有費若
天造而神設兮豈民力之或煩化榛莽為宏麗兮敞隘
蔽為爽塏草蠹橈而雄壘兮易朽腐而堊丹茲棟隆之
規模兮特於此乎小試非成毀之相仍兮數循環而無

端鎮越歸乎中踞兮修廊翼其旁拱何獨斂夫散氣兮
所以重夫中權巨扁揭乎雲霄兮鈎畫粲乎星斗山靈
為之呵護兮珍光赫而屬天前方臺之月華兮後蓬萊
之雲氣左燕春之凝香兮右清白之寒泉繞層城以拂
雲分開屏障於四面卧林影於雲壑兮棲山光乎二軒
吸平湖於酒杯兮浮翠峰於茗椀送歸鴻於天外兮數
飛鷗於海門動秋聲之撼撼兮泊晴嵐之藹藹餞崦嵫
之夕照兮賓暘谷之朝曦上越王之危臺兮誦唐人之

傑句鷓鴣飛而地迴兮晴烟渺而天寬飛蓋游乎清夜
兮暮輕煙之素練棹歌發乎中沚兮浴明月於金盆麗
譙湧乎青冥兮角聲起而寥亮佳山蔚其照眼兮洗萬
里之陰氛新隄平而擬掌兮沸行歌以載路漕渠濬而
舉錨兮鼓千艘而駢闐雄威扁營疊創兮雷歡聲於貔
虎泮宮修貢闈闢兮遂飛躍於魚鳶臺府煥而一新兮
巖壑為之改觀他人視之拱手兮公談笑而不難既游
刃之有餘兮復善刀而藏用寂然若無所營兮湛中襟

而靖淵炷爐香而讀易兮悟至理於泰否託寄軒之柱
刻分等遽廬於乾坤上方藏事明庭兮將入扈於豹尾
如旄倪之借留兮紛截鐙以攀轅繫郢曲之寡和兮信
蕭規之難繼民願公無遽歸兮帝謂吾今召環雖卿月
之暫駐兮幸臨照夫越土恐使星之遷次兮迫泰階之
魁躔推治越之道治天下兮固我公之餘事然越人愛
公如慈父母兮願託歌而永傳客乃斂衽肅容兮屏氣
弗敢復言孫子於是濃墨大字兮終夫越問之篇

右良

收

讀單鍰水利書

明徐獻忠

獻忠讀此書知東南水利莫詳於此今昔雖有少殊而源委蓄泄之大勢固猶同也今世吳江隄岸日益堙塞視鍰建議之時又不知其幾何矣疏鑿之功既不能復舉則湖州泄水之利自有不容以不講者夫溧陽五堰西受高淳宣城引入九陽江諸湖之水東注震澤此單鍰所謂上源之患也明初鑿諸溧水石河遞引而北注

而於五堰築成堅壩似乎太湖之患可泄矣然太湖之源實出於天目及宜興以西諸山方春夏水發之時洪流奔放悉注太湖五堰之害雖息而湖州之害固不可免也今吳江隄岸既不可復鑿豈可不思其泄注之故哉湖州運河東抵平望幾一百二十里太湖之水半泄其間自運河以南諸溪港會同北流餘不諸溪及運河之水一派皆南出於石門一派出於阜林一派由巖墓東南出諸嘉興一派東出王江涇一派出平望其間港

汭經泄之處為民間所佔日漸狹小而上源諸漾積受
洪流之處漸至填塞為蘆埂圍築為藕蕩者又不知其
幾也是可不為厲禁以防關閉之患哉大抵歲多南風
則水患多在姑蘇歲多北風則水患多在吳興此又分
別所加之患也防患之道自宜周詳故宋乾道二年詔
漕臣王炎相視開掘浙西世家新圍草蕩菱藕諸陂及
岸際圍築耕種者所至令守倅縣令同共措置淳熙三
年御史傅淇言近臣奏諸圍田堙塞水道之害務在禁

止此乃拔本塞源之要術然豪右之家未有無所憑依而肆意圍築者聞浙西諸縣江湖草蕩計畝納錢利其所入給據付之望條約諸縣毋得給據與官民戶茲皆前朝防患之道及今禁約猶可消滅未來之患若視為末務等於故常而不加之意則吳興他日之患更有不可勝言者矣夫吳興水利更與蘇松不同蘇松有海潮淤塞之患不盡出於人為吳興本無此患惟禁絕有力者圍築之患足矣有為民之仁念者幸加意於此

評宋戶部尚書梅執禮

明 宋 濂

自宣和至靖康十年之間梅氏一門殺身殉義者二人
彼豈甘以頸血濺地哉第以君上決不可背名教決不
可負綱常決不可虧忠義一激雖泰山之高不見其形
雷霆之鳴不聞其聲刀鋸在前不覺其慘鼎鑊在後不
知其酷必得死然後為安也今去數百載忠剛之氣塞
乎天地之間凜然如生非烈丈夫能如是乎使當時屈
膝受辱以保首領受賤惡雖生百年何益也賈誼有言


守圉扞敵之臣誠死城郭封疆梅溶以之法度之臣誠死社稷執禮以之

張玉田歸杭疏

元 袁 桷

采藥神山悟朱顏之今昨呼猿靈鷲勞清夢之去來要當青鞵布襪徒步徑歸誰信黃絹色絲空言何補弄笛恨邊雲慘淡坐窗惜江月淒涼落葉孤尊無復金貂之慷慨古梅千檻空懷玉照之風流食肉之相已非解牛之技焉用焦桐未遇斷木自慙風月江湖肯後當時之

置驛交游金石定先桑子之裹糧鄙騎驢灞上之寒遂
跨鶴揚州之願膝行而謝捆載以歸燈火話平生慰老
弟兄之白髮詩書娛晚歲還名祖父之青氈恩極無言
情陳有覲



浙江通志卷二百六十八